

Ioh kem ki Pulit ia u rangbah ba shoh bad thang ia ka kurim

Jowai, Naiwieng 19: Ki Pulit ka West Jaintia Hills mynta ka sngi Ba-ar, kila kem ia uwei u bried ba kyrteung u D.Dkhar jong ka shnong Latyrke, East Jaintia Hills namar ka jingshoh bad thang ia la ka kurim ha ka iingsah ha shnong Niriang kaba hap hapoh ka Thadlaskein Block.

Ki Pulit ki pyntip ba une u bried ula shoh ia a kurim haduh ba kam tip bried shuh bad hadien ula thang ia ka durkhmat bad ka ryndang jong ka.

Kane ka Longknie hadien ba kyndit bynriew kala pyntip mar mar sha ki bahaiing kiba la pyntik mar mar sha ka Shnong Kut, West Jaintia Hills ban ioh jingsumar na ki nongsumar kynbat.

Ki Pulit ki pyntip ba kane ka jingjia kala jia ha ka 29 tarik Nailur bad hadien katto katne sngi ba jia kane ka jingjia, une u kurim ula wan bad ialam ia ka sha Jowai Civil Hospital, kaba la phah kit noh sha Civil Hospital Shillong.

Ki iathuh ba hadien ba pyntik hospital, une u bried ula phet rieh hynrei hynne ka sngi kila ioh ban kem noh ia u bad la ialam tian bisnar hakmat ka iingkashari kaba la phah set ia u hapoh ka Judicial custody ba 15 sngi.

Ha along shi jingim ia u nongpyniap bried

Ka Kiad ka nongshun bad nongpyniap bried ba shyrkhei, diaw mynsiem ki longkmie



Ki khynnah skul ba iashim bynta ha ka jingiaid rallyu. Ki longkmie ba dang kren ha ka jingialang. (Dur:Mawphor)

Nongstoiñ, Naiwieng, 19: “Ka jingjia ia pyniap bried kaba la mih ha ka shnong Rimyniar jong ka thaini Maweit West Khasi Hills ha ka step jong ka 12 tarik mynta u bnai, ka dei beit na ka daw ka Kyiad kaba long ma ka, ka nongpynklumar ka nongpynjot bad ka nongpyniap ia ka mynsiem bried,” kane ka long ka sur kaba la mih hynne ka sngi ha ka jingialang paidbah lane ka rally pyntem halor katei ka jingjia.

Ki nongkren khamtam ki ar ngut ki longkmie kata ka kong Mislinda Ryntong bad

ka Seraphina Ryntong, ki la pynpaw shynna ba ka daw hi ka dei ba beit ka kyiad. Ki la ong ba ka long kaei kaei kaba ngim lah ban pyrkhath ba kat ia ka jingim ba kador, la shim noh tang na ka daw ka jingbakla ha ka ktien ka thylliej hapdeng ka jingshongshit kyiad.

“Nga pynrem jur ia kane ka jingjia bad nei dawa ruh na ki bor jong ka aiñ ryngkat ka jingtip ki bor synshar shnong, ba ngi dei ban pynshitom tyngeh ia une u bried u ba la leh ia kane ka kam. Ngim lah ban len da lei ei ruh ba ka daw ba kongsan

jong kane ka jingpyniap bried ka dei beit na ka kyiad. Namarkata, ki bor shnong ki dei ban shimkha ia kane, khnang ba ka suk ka sañ bad ka koit ka khiah hapoh ka shnong bad ka thaini kan don, ym ba ka kyiad kan ioh pynban ban synshar”, ong ka kong Mislinda Ryntong kaba dei ruh ka ASHA.

Ka la ong ruh, “Myntoi aiu keñi mynsngi leit bylla, mynmiet pat la pynlut ha ki kam dih kyiad. Ka long kaba sngewsih haduh katta ba ha ka jaka ban kiew shakhmat bad jyllei ki kam ba bha, hynrei jyllei pynban da ka kyiad ha ka shnong Rimyniar bad ka thaini hynriew shnong, kaba ka kam jong ka kyiad ka long tang ban shu pynkhemrain”.

Katba na ka liang ka kong Seraphina Ryntong ka la ong, “Ka long kaei kaei kaba ngim lah ban pyrkhath ba kat ia ka jingim bried la shu shim noh tang na ka daw ka jingbym biang shuh ha ka ktien ka thylliej. Ngì te ki longkmie ngi kwah ia ka im suk im sañ ka bha ka miat. Ngim kwah ba ka dong ka thaini kaba nalar la ban ka jingduk jingkyrduh, hynrei ka jingjyllei jong ka kyiad pat

ka la long kaba shyrkhei, kat haduh ba ka la nang ban shuh shuh ia ki jingeh kiba bun jait”.

“Tang ha kine ki khyndiat snem kiba la dep ngi la sakti ia ka dong ka thaini kaba la bun satang ki jingsniew ba bun jait naduh ka kam pyniap bried, ia shoh ia dat bad kiwei pat kiba wanrah ia ka jingbym shngaiñ shuh. Nga buh jingkyll hato phi ki Kñi, ki Kpa, ki kmie bad ki samla, hato phi hun mo ban shu peit ka ba kane ka jingsniew kan synshar ha ka thaini jong ngi. Da ka jingsngewkhia, nga kyntu sha baroh sngewbha to ngin kyndiat bynriew noh bad iatreilang ba rat dyngkhong ia kine ki jingsniew baroh”, ong ka kong Seraphina Ryntong.

Kiwei kiwei pat kiba la ai jingkren ha kane ka sngi ki dei ki riew rangbah ba kynthup ia u Bah Endrius Ryntong Secretary FKJGP Maweit circle, samla Ebrius Ryntong President KSU Nongtraw unit, Bah Jerimaia Dkhar President HYC Maweit circle, Sordar shnong Wahlyndoh Bah Kitborlin Kharbani, Bah Dosingh Rongrin sordar Nongdohlieh, Bah Shimbom Umiong Nonghikai Rimyniar Presbyterian LP skul, nangta la donlang ruh ban sakti da ki bried na ka liang jong ka tnad Pulit bad Excise.

Lah ban kdew hangne ba ia kane ka jingialang la pnylong da ka Synjuk Nongsynshar Shnong Hynriew Shnong ka thaini Wahlyngdoh, Maweit. Ha kane ka jingialang kaba la pnylong ha ka shnong Wahlyngdoh, la tuid da ki spah ngut ki riew paidbah, ki longkmie longkpa, ki nonghikai bad khynnah skul kiba ka sur kaba tylli na baroh ka long ba dei ban Set Phatok shi jingim ia u nongpyniap bried.

Kum ban shu pynkynmaw biang hangne ba ka jingmih paidbah hynne ha ka shong Wahlyngdoh, ka dei na ka daw ka jingjia pyniap bried ha ka shiteng synnia jong ka 12 tarik ha ka por 1 baje ei ei, ha kaba uwei u rangbah ba la 50 snem ka karta, u la shah pyniap ha la u jong u paralok hadien ka jingia nia ia tim ia tla kaba jur ha ka iing sah kaba don ha katei ka shnong Rimyniar.

U rangbah ba shah pyniap la tip kyrteung u Bokstar Sohshang ba 50 snem u ba dei ruh u nonghikai skul. Katba u bried u ba la shim ia ka jingim une u rangbah u kyrteung u Piswel Langrin u ba dei ruh u trai iing.

Halor ka jyrseh Lottery khynra ka ED ha Meghalaya bad sha kiwei ki jylla

Shillong, Naiwieng 19: Ka Directorate of Enforcement (ED) kala pynlong ia ka jingkhynra ha ka 22 tylli ki ling ha Meghalaya bad 5 tylli kiwei ki Jylla halor ka jyrseh Lottery u Santiago Martin.

Ka jingkhynra ka dei halor ka jingtohkijong ka ED pyrshah ia u Santiago Martin bad ka kompani jong u ka M/s Future Gaming and Hotel Services Private Limited lem bad ki paralok jong u. Saw tylli ki Printing Press kiba don bynta ha ka jingshon ia ki lottery ticket ruh kila ngat lang ha ka jingkhynra.

Ka jingtohkijong ka ED kala mih na ka ejarah bala uxor da ka Tnad Meghalaya Police halor ka jingujor jong u Director ka Meghalaya State Lottery. Ia kane ka case

la shimti da ka CBI haba shim lang ia ka ejarah bala uxor da ki Pulit ka Kerela.

Kiwei pat ki Jylla kiba ka jingkhynra kala jia ki kynthup ia ka Tamil Nadu, West Bengal, Karnataka, Uttar Pradesh bad ka Punjab kaba long kat kum ka Prevention of Money Laundering Act (PMLA), 2002.

“Ka jingkyntoh kala mih ka kynthup ia ka jingkwah pyniaid marwei ia ka iew Lottery, ka jingdie ia ki ticket thok, ka jingpyniaid hala ka mon ia ka song pisa ba jop, bad jingpynkylla ia ka pisa beaiñ (black money) sha ka pisa hok da kaba pyniaid ha ka prize jong ka ticket. Kine ki kam kila wanrah ia ka jingduhngong kaba khraw ia ka pla tyngka ka Jylla bad ki paidbah” ong ka ED ha ka

kyrwoh.

Ka jingkhynra kala lam sha ka jingioh kurup ia ka pisa bym lah ban batai, kaba kot haduh T.12.41 klur, bun ki tiar digital bad ki kot ki sla kiba donkam. La kurup ruh ia ka Bank FDR ba T.6.42 klur ha kane ka jingkhynra.

Ka ED kala shem ruh ia shibun bah ki jingkyntoh ha ki nongkynto ha Coimbatore Chennai, Mumbai, Dubai bad London bad kiwei kiwei.

Ha ka jingtohkijong ba nyingong ia kane ka kam ha ka ED, Kochi, la shem ba ka Martin Santiago bad ka kompani jong u, kila ioh lum pisa beaiñ haduh T.920 klur na ka kam lottery ha kaba haduh T.622 klur ka nongkynti la kurup noh. Ka jingtohkijong ia kane ka kam ka dang ia id shakhmat.

Ba bteng na Sla 1

Naduh kad-liengsuiñ haduh madan Polo mih ki paidbah ban pynkup burom ia u Steve Jyrwa

naduh kad-liengsuiñ Guwahati ki paidbah ki mih ban ai khublei bad pynkup burom ia u.

Ynda la poi ha Mawiong, ISBT ruh ki paidbah kynthup ia u MDC ka Mawlai, Bah Teibor Pathaw ryngkat ki nongialam jong ka Mawlai Social Service Organisation (MSSO) ki la mih lang khruai ban pynkup burom. Na ka liang u MDC u la pyndeng da u Paila ryngkat ka ryndia kum ka dak ka jingai burom na ka bynta katei ka nam kaba u la wanrah ym tang ia ka nongbah Shillong hynrei ia ka jylla hi baroh kawei.

Hadien kane pat beit beit u la leit sha la iing sah kaba don ha Nongmensong bad nagne pat sa sha iing u Lat ban kynduh kum ka burom.

Na ka liang u Lat ka jylla Meghalaya u CH Vijayashankar mar ia poi u pynkup burom ia u une u samla kum ka jingithuh ia katei ka jingjop jong u.

Ha kane ka jingpynkup burom na ka liang u Lat u la ai khublei ia u Steve Jyrwa

halor kane ka jingjop jong u, ha kaba kane ka la wanrah ia ka burom, ka jingithuh bad ka jingsarong ia ka jylla Meghalaya hapoh ka ri. Na ka liang u Lat u la pynkup burom ia u da ka Raj Bhavan Memento bad Khasi Rindia.

Dei ynda la mih na iing u Lat ba utei u samla u la leit pat ban ai khublei ia ki paidbah ha ka lympong kaba la pynbit pynbiang da ka All Meghalaya Dancers Association hapoh ka jingialam jong u Bah Kitbok Thabab bad ka kynhun ryngkat ka jingiatrei bad ki bahaiing.

Ha kane ka jammiet, ki kynhun bad ki seng bapher bapher kynthup ia ki nongmikhmat na katei ka thain, kata u Bah AL Hek ba dei MLA bad Myntri Sorkar kumjuh u Bah Pynshngain N Syiem ba dei u MDC bad Deputy CEM ka KHADC ki la poi lang ban ia kmen bad risa lang halor katei ka jingioh jong u Steve ban khur ia ka nam kaba khraw tam ha ka lympong iakob shad ha ka Ri.

Nangjur ka kam khañ rnga ha kane ka jylla, watba la shakhkhang

ha kaba la iohi ba ym tang sha ki thaini West Khasi Hills District jong ka jylla Meghalaya kaba la ju bna nam bha ia kane ka kam khañ bad thang rnga, hynrei ha kine ki sngi wat sha ki jaka khappud jong ka thaini Ri Bhoi district ruh kane ka kam khañ rnga ka la ieng rasong bha.

Ia kane la shem ha ka jingleit jurip jong u nongthoh khubor ha kaba la lap ba bun tylli ki shnong kane ka thaini kiba la sdang mynta ia kane ka kam khañ.

Haoid ym lah ban len ba ki bried kiba leh ia kane ka kam khañ ki la leh da ka jingbym bane na ka bynta ki lad kamai jakpoh bad ban bsa ban pyndap ia la ki jong ki iing ki sem naba ym don pat da kawei pat ka kam ba kin trei.

Haba ioh ia kren bad katto katne ki nongkhañ rnga sha kane ka thaini khappud jong ka Ri Bhoi district ki bym kwah ban pynpaw kyrteung ki la kubur ba kane ka kam khañ rnga kaba ki leh manla ka sngi kadei shisha ka kam kaba beaiñ bad kaba la shah khang ha ka iingkashari hynrei ki la pat ba kim don lad da kumwei pat namar ka sorkar ruh kam don ki rukom treikam ne ki policy ban ai kam ia ki khnang ba kin lah ban seng pat da kiwei ki kam lajong kiba iahab bad kane ka thaini.

Ki la ong ba lada khañ jhur ruh ka long kaba eh ba kin pyniaid iew, lada ki treikam mistri ruh mynta ka kam ka la duna naba tang kiba heh spah ki iohlad ban trei ia ki kam jingtei jong ka sorkar ynnai iakren lei bad ki

kam jingtei shimet naba ka dor ka la heh lypa, kumta ki shim noh da kane ka kam khañ rnga sha ki nongthied ki wan hi sha ki jaka ban thied ia une u rnga.

Kumta ha kaba iadei bad kane ki la kyntu ia ka sorkar ba kam ym dei ban pynlut kai ia ka pisa ba ka la shim da ka ram ha ka kim tulop ia ki nongtrei kiba ka la wanrah nabar jylla hynrei ban khmih shwa ia la ki jong ki nongshong shong ba kin im hapoh la ka jong ka jylla khnang ba kin ioh trei ha ki kam bapher bapher bad ba ka jingtyrwa ban ai ram bapher bapher ban sengkam lajong kadei ban treikam bha khnang ba kiba kwah shim ram kin suk hada leit sha ki bank ban lait shah pynthut bad shah thlia ha kiba bun rukom kaba pynthait noh ia kiba kwah shim ram.

Ban iada ia ka jingim ki longkmie ba armet bad khunlung, la rakhe ia ka National Newborn Week

Khliehriat, Naiwieng, 19: Ia ka taiew ba kyrpang ba la tip kum ka National Newborn Week 2024 la pynlong ha Khliehriat Civil Hospital, East Jaintia Hills District halor ka phang pdeng “Optimising Antimicrobial Use to Prevent Antimicrobial Resistance (AMR) in Newborns”, ba la pynlong da ka ophis District Medical & Health Officer, East Jaintia Hills District kum shi bynta ban pynsngewthuh kumno ban iada ia ka jingim jong ki longkmie kiba armet bad ki khunlung ba dang shu kha.

U District Medical

& Health Officer Dr.D. Shylla haba kren ha ka jingialang u la kren halor ka jingdonkam ka jingshim khia lang kiwei kiwei ki tnat ruh kynthup lang ruh ki nongtrei ka tnat ka koit ka khiah, kum ki ASHA bad baroh ki paidbah ban iada ia ki khunlung na ka jingshah ktah ha ki khñiang jingpang, namar da ka jing shim khia lang yn lah ban tehlakam ia ka jingiap ki khunlung kiba dang kha.

U Dr. Shylla u la kren halor ka jingdonkam ki jingbam tei met, ka jingkhuid jingsuba bad ka jingshim khia ki longkmie ban ioh ia

ka koit ka khiah ha ka por ba ar met ban long kiba koit ba khiah.

U Medical & Health Officer (Paediatrician), Khliehriat Civil Hospital, Dr Henry RM Lamare u la batai bniah halor ka phang pdeng kaba iadei bad ka taiew ba kyrpang ka “Optimising Antimicrobial Use to Prevent Antimicrobial Resistance (AMR) in Newborns” kata ban kymen ban lah ban shim ia ki jingia da ban lait na ki jingpang ha ki khunlung ba dang kha, u la kren ruh halor kiba bun jait ki jait jingpang kiba iabit ha ki khunlung kiba

dang hapoh ka jingri jingsumar ka kmie, u kpa, kiba donkam ban sumar khlem ka jingdonkam than ban kynduh ia ki nongsumar.

U Dr. Lamare u la ong ruh ba ka long kaba donkam ba ki longkmie ba armet bad ruh ki khunlung ba dang kha ba kin don ka jingkoit jingkhiah bad ruh ba ki ASHA kin pynsaphiang ia ka jingtip sha ki shnong ki thaw bad ruh ban kyntu ia ki paidbah ban shim ia ki synjam ban long kiba koit ba khiah bad ruh ban buddien ia kito ki longkmie kiba ar met khnang ban iada ia ka jingim jong ki longkmie bad ar met bad ia ki khunlung ba ki dang pun.

Ha kane ka sngi, ki ASHA ba la lam khmat da ka CHO, Khliehriat MCH, ka kong R. Dkhar ki la pyni nuksa ia ka rukom ban sait ia ki kti ban lait na ki khñiang jingpang.

Kiwei pat kiba la ai jingkren ki kynthup ruh ka District Immunization Officer, East Jaintia Hills District, ka Dr (Mrs) N. P. Suchiang, u DPM, NHM, East Jaintia Hills District, u bah A. Dhar bad ka PHN, East Jaintia Hills District, ka kong Pinky Lawait.

Nang kiew ka jingbun ki longiing kiba duk ha jylla Meghalaya

ki shongkha khynnah bad ioh khun ha ka por kaba tang ialade ruh kim pat lah bha ban sumar, nalar ba ki kha khun jan man la u snem bad la ka duna ka jingioh ban pyndap pynbiang bam ia ki khunlung.

Ka kmie ruh ialade ka tlot bor bad ki khun ruh kumjuh. Te haei keñi ka kot ka khiah haba hap ha kum kane ka apot. Bun kiba ong ba ki khun ki dei kiba ai u Blei bad dei ban pdiang katba ai. Hynrei ha kane ka juk mynta ha ki longiing kiba shemphang ha kaba u lok bad ka lok ki iahap jingmut ki don ka jingiakren kumno ban kham pynjan khun namar kam myntoi ban shu kha khun khlem da lah ban pynbiang ia ki.

I synei pynban ia ki khunlung khynnah kiba ha ka jaka ban don ha skul ki la hap leit ap blang ap masi. Ki la duh noh ka jinglong khynnah bad la pyntik ha ki typrang kiba rit bad batlot jong ki ia ka lyngkor kaba khia. Hato kane kam long ka pop na ka liang ki kmie ki

kpa haba ki kha ia ia khun khlem da lah pynbiang ia ki bad ban phah leit skul? Dei na kane ka daw ba ki stad pule shaphang ka ioh ka kot (economists) ki ong ba haba ioh khun khlem pyrkhath ka jingduk ruh ka hiar pateng na kawei ka pateng sha kawei pat bad ki longiing kim lah lait satia na ka jingduk.

Haba ym lah ban phah skul ia ki khun, ki bapli ki sahdiem bad kim ioh lad satia ban kiew ha ka jingim jong ki. Hato kane kam long mo ka pop ki kmie ki kpa kiba kha khun khlem da pyrkhath? Peit ha sor pat, ha kine ki snem kiba la leit, bun ki kmie ki kpa ki kha tang arngut ki khun khnang ba kin lah ban pynheh pynsan bha ia ki bad ai ia ki ia ki lad jingpule kiba **biang**.

Ha kane ka juk kaba mynta ki samla kynthei kiba lah nang lah stad, bun ba kim kwah shongkurim. Bad lada shongkurim ruh kim kwah ban shu long tang kum ki nongkha khun. **Ki kwah** ban

trei ha ki kyrdan kiba biang bad ban leh kumta kim kwah satia ban shah teh mraw ha iing tang ban shu long ki nongsumar khun. Kane ka juk kaba mynta kam dei shuh kajuk kha khun khat-wei khat-ar ngut kum ba ju long mynshuwa. Kiba bun ki kynthei ki la lah ban pyrkhath na ka bynta ka bha ka miat lajong.

Hoooid don ki nongialap niam kiba kyntu ia ki kynthei hana ba ki dei ban kha khun namar kata ka dei ka jingbthah u Blei. Kum ia kita ki nongialap lah dei ban kylli lada kin ai jingiarap lem ne em man la u bnai ban pyndap ia ka bam ka dih bad ka bai skul ia kita ki khun kiba lah kha? Lada kim lah ban ai jingiarap, te kim don hok ban kyntu ia ki kynthei ba kin shu kha khun khlem pyrkhath.

Ka jingiap jong kiba bun ki kynthei ha ka por kha khunlung (maternal mortality) ha ka jylla Meghalaya ka long kaba bun eh ha ka ri. Ka daw ka long namar ba ka kmie ka kha khun jan man u

snem bad ka met jong ka kam pat lah ban tei satia hynrei lah wit khun biang. Ia i khunlung iba dei ban dang ai buñi ruh lah hap pynduh buñi noh namar ba lah ioh khun biang tang hapdeng saw bad san bnai ba la dep kha khunlung. Dei na kane ka daw ba i khunlung ruh i tlot bad ka kmie ruh ka tlot. Bunsien ha ka por kha iap noh ka kmie na ka jingtlot palat lane khlad noh i khunlung. Toi ia kine kiei kiei lah dei ban hikai bha naduh na skul, hynrei bun ba ngi ia lehraini ban iakren ia kane ka mat ka phang kaba kongsan eh na ka bynta ka imlang sahlang.

Lada ki longkmie hi kam rangbah jingmut bad rai ba kin da pyrkhath shiphew sien shuwa ba pun khun, yn ym don mano mano ruh ba lah ban pynpyrkhath lem ia ki. Ka jingeh bad ka jingduk kin nang ia ban bad na kawei ka pateng sha kawei pat. Ha ka jaka ban nangkiwum ba kin shu kha khun khlem don ki lad ban ioh ka kam ka

jam kaba biang ngin nang hiar pynban arsut.

Ka sorkar jong ngi kam salia la ngi nang shah tan sha tbian ha ka jingduk namar katba nangduk ki bried katta nangduk ban shu siew pisa ia ki ha ka por elekshon ban jied ia ki MLA bad MDC kiba pyrkhath tang ialade shimet.

Ym don uwei ruh u ban pyrkhath sngewkhia shisha na ka bynta ki nongjied jong u. Ialade te lah biang ki iing paki dulan ha sor Shillong. Ki nongjied ki mat iap shato. Kim salia eiei. Kin sa shu wan khroh tang haba lah jan ka elekshon.

Namar kata to da iapyrkhath jngai ko phi ki samla khynnah shuwa ba phin shimti ia ka lyngkor longkmie bad longkpa. Kam dei kaba suk. Ka lanti iaid ka long kaba thar da ki shiah suda. A ban jin da la sneng lem ki longkmie kiba lah iohi shuwa ia ka sngi bad u bnai lehse kane ka jylla bad ma ngi kiba shong ba sah ha ka ngin ym shah kah da une u lyoh uba dum.